



## La polizia chantunala dal Grischun infurmescha davart las prescripziuns pli severas concernent ils sezs d'uffants en autos privats a partir dal 1. d'avrigl 2010

**A partir dal 1. d'avrigl 2010 ston uffants sut 12 onns vegnir segirads en l'auto cun systems da retegn correspondent, sco p.ex. sezs d'uffants u plimatschs da seser spezial. Exceptà da quai è il sez davos d'amez, sche quel dispona mo d'ina tschinta da batschida.**

Senza dubi po in accident chaschunar grevs donns ad in uffant che n'è betg segirà correctamain. Uschia è il privel da vegnir blessà grevamain u mortalmain set giadas pli grond per in uffant betg segirà. En cas d'accidents vegnan ils uffants catapultads tras il vehichel e siglian cun ina vehemenza enorma cunter il sez, cunter il levagl, cunter l'armatura u cunter la fanestra. Il cussegl federal ha concludì novas mesiras per promover la segirezza dal traffic. En autos privats ston uffants sut 12 onns seser a partir dal 1. d'avrigl 2010 en indrizz da retegn spezial.

Fin ussa valeva l'obligaziun da seser en sezs d'uffants per uffants fin 7 onns. Exceptads da questa regulaziun èn uffants ch'èn gia pli gronds che 1,50 meters. Tut tenor la paisa da l'uffant dovri in plimatsch da seser spezial, in sez d'uffants u in sez anatomic per pops. En plazzas che disponan mo d'ina tschinta da batschida ston uffants da 7 onns u dapli vegnir segirads mo cun questa tschinta e betg cun in indrizz da retegn spezial. Persunas pli veglias e pli grondas ston sa segirar cun las tschintas normalas.

Tgi che na segirescha betg correctamain in uffant en l'auto privat, vegn chastià cun ina multa disciplinara da 60.00 francs, perquai ch'el transporta in uffant sut 12 onns che n'è betg segirà.

Ils indrizz da retegn ston ademplir almain ils standards da segirezza da la cunvegna correspundenta da l'ONU en la versiun 03 u en ina versiun pli auta (Economic Commission for Europe; UN-ECE, nr. 44). Ils geniturs pon controllar quai sin l'etichetta respectiva a maun da la caracterisaziun 03 (u pli auta).

Indrizz da retegn da las versiuns 01 u 02 na dastgan pia betg pli vegnir duvrads a partir dal 1. d'avrigl 2010.

Las emprimas duas cifras dal label da controlla dal sez d'uffants ston vegnir controlladas. Sch'il numer cumenza cun 01 u cun 02, na dastga il sez d'uffants betg pli vegnir duvrà a partir da l'avrigl 2010.

